



Pranimi / Dorezimi Primit / Prezentimi Received / Delivered	30.12	2021	1	viti god year
Ushqim / Njesia Orqan / Jednica Org. Unit	Nr. Prot Rr. Prot Prot No	Shtesa Prilog Appendix	Sasia Kolicina Quantity	
SKIMBIM 6428/2021			114	



Republika e Kosovës  
Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS  
NEZAVISNI NADZORNI ODBOR CIVILNE SLUŽBE KOSOVA  
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.1008/2021

Këshilli i Pavarur Mbikëqyrës për Shërbimin Civil të Kosovës-Kolegji për shqyrtimin dhe vendosjen e ankesave në përbërje nga: Malsore Gashi-Bajraktari-kryetare, Jeton Koca dhe Eshref Shabani-anëtar si dhe Ardita Perçuku-Shyti-Zyrtare e lartë për Bashkëpunim Profesional në cilësinë e procesmbajtëses, kanë shqyrtuar ankesën me numër A.nr.1008/2021 të datës 06.12.2021 të parashtruar nga ankuesi me adresë rr."Ferit Curri", Lagjia Arbëri, Komuna e Prishtinës, kundër Vendimit me Nr.75/2021 të datës 30.11.2021 të Menaxherit të Personelit të Ministrisë së Kulturës, Rinisë dhe Sportit, në çështjen juridike "kërkesë nga marrëdhënia e punës", duke vepruar në pajtim me nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me datën 30.12.2021, mori këtë:

V E N D I M

I. REFUZOHET si e pabazuar ankesa me numër A.nr.1008/2021 e datës 06.12.2021, e parashtruar nga ankuesi

II. Mbetet në fuqi Vendimi me Nr.75/2021 i datës 30.11.2021 i Menaxherit të Personelit të Ministrisë së Kulturës, Rinisë dhe Sportit.

A r s y e t i m

Ankuesi në bazë të Kontratës së punës të datës 24.05.2016, është i punësuar në pozitën "Vozitës" në Departamentin e Financave dhe Shërbimeve të Përgjithshme -Sektori i Logjistikës. Menaxheri i Personelit i Ministrisë së kulturës, Rinisë dhe Sportit me datën 30.11.2021 ka nxjerr Vendimin me numër Nr.75/2021 me të cilin ka bërë deklarinimin e statusit të zyrtarit publik për ankuesin duke e kategorizuar ankuesin në Nëpunës Administrativ dhe Mbështetës.

Ankuesi, i pakënaqur me Vendimin me numër Nr.75/2021 të Menaxherit të Personelit të Ministrisë së kulturës, Rinisë dhe Sportit lidhur me deklarin e statusit të tij i cili sipas këtij vendimi është degraduar duke ua ndërruar statusin që i kategorizon në nëpunës administrativ dhe mbështetës, me datën 06.12.2021, fizikisht ka parashtruar ankesë me Nr.Prot:5821/2021 në Këshillin e Pavarur Mbikëqyrës për Shërbimin Civil të Kosovës, me pretendimet ankimore që vendimi për deklarin të statusit të zyrtarit publikë është nxjerrë në kundërshtim me Ligjin për Zyrtarët Publikë dhe Rregullores Nr.10/2020 për Deklarimin e Statusit të Zyrtarit Publikë.

Këshilli i Pavarur Mbikëqyrës për Shërbimin Civil të Kosovës, me datën 13.12.2021 ka dërguar kërkesën për përgjigje në ankesë tek Ministria e Kulturës, Rinisë dhe Sportit, ndërsa me datën 21.12.2021, kemi pranuar përgjigje në ankesë nga Ministria e Kulturës, Rinisë dhe Sportit me shkresat e bashkangjitura të lëndës.

**Kolegji për shqyrtimin dhe vendosjen e ankesave, për marrjen e vendimit meritore ka administruar këto prova:** Ankesën me Nr.Prot:5821/2021 të datës 06.12.2021 e parashtruar nga ankuesi në Këshillin e Pavarur Mbikëqyrës për Shërbimin Civil të Kosovës; Vendimin me numër Nr.75 të datës 30.11.2021; Kontrate e marrëdhënies së punës e datës 24.05.2016 e ankuesit; Vendimin Nr.39/2019 i datës 04.02.2019 i Komisionit të Ankesave të Ministrisë së Kulturës Rinisë dhe Sportit; Ankesë e datës 17.12.2010 e parashtruar nga ankuesit për Komisionin për Ankesa dhe Parashtrës të Ministrisë së Kulturës, Rinisë dhe Sportit; Kërkesa për përgjigje në ankesë e datës 13.12.2021 nga Këshilli i Pavarur Mbikëqyrës për Shërbimin Civil; Përgjigja në ankesë e datës 21.12.2021 nga Ministria e Kulturës, Rinisë dhe Sportit me shkresat e bashkangjitura të lëndës; E-maili zyrtar i datës 09.06.2021 dhe Listën për deklarin të statusit të zyrtarit publikë.

Kolegji për shqyrtimin dhe vendosjen e ankesave, për vendosjen e kësaj çështje, pasi ka shqyrtuar të gjitha shkresat e lëndës të parashtruara nga palët, ka konstatuar që ankesa e ankuesit **është e pabazuar, sepse:**

Bazuar në provat e lëndës, po ashtu edhe në dispozitat ligjore të aplikueshme në fuqi në kohën e themelimit të marrëdhënies së punës së ankuesit, në pozitën "Vozitës" respektivisht Ligjit Nr. 03/L-149 për Shërbimin Civil të Republikës së Kosovës, ankuesi nuk e ka pasur statusin e nëpunësit civil në bazë të nenit 4 paragrafi 4 të Ligjit Nr. 03/L-149 për Shërbimin Civil të Republikës së Kosovës, i cili ka përcaktuar se: *„Personeli i punësuar nga institucionet e administratës në nivel qendror dhe komunal, përgjegjës për kryerjen e funksioneve mbështetëse dhe të mirëmbajtjes, nuk janë nëpunës civilë”*, sepse marrëdhënia e tyre e punës nuk i nënshtrohet dispozitave të legjislacionit për shërbimin civil, por lidhet në pajtim me nenin 4 paragrafi 1 të Ligjit Nr. 03/L-149 për Shërbimin Civil të Republikës së Kosovës, i cili përcakton se: *“Marrëdhënia e tyre e punës rregullohet me Ligjin e Punës, ligje të veçanta, me marrëveshje kolektive ose me rregullore sektoriale”*.

Kolegji për shqyrtimin e ankesave, po ashtu ka marrë parasysh edhe Qarkoren Administrative Nr.01/2014 të datës 08.12.2014 të lëshuar nga Ministria e Administratës Publike, e cila ka definuar listën e të punësuarve në Institucionet e Republikës së Kosovës të cilët janë përjashtuar nga shërbimi civil, në bazë të nenit 4 paragrafi 4 të Ligjit Nr.03/L-149 për Shërbimin Civil të

Republikës së Kosovës, ku nën numrin rendor 4 pika 1 të kësaj qarkore njëra prej pozitive të transportit është përcaktuar si pozitë që nuk është pozite e nëpunësit civil, andaj ne rastin konkret pozita e ankuesit „Vozitës” sipas legjislacionit të lartcekur nuk ka hyrë në kategorinë e pozitive të shërbimit civil.

Me hyrjen në fuqi të Ligjit Nr. 06/L-114 për Zyrtarët Publikë dhe Rregullores (QRK) Nr.10/2020 për Deklarimin e Statusit të Zyrtarëve Publikë, institucionit e administratës publike në bashkëpunim me Departamentin për Menaxhimin e Zyrtarëve Publikë të Ministrisë së Punëve të Brendshme, kanë qenë të obliguara që të bëjnë deklarimin e statusit të zyrtarëve publikë, siç është përcaktuar me nenin 83 të Ligjit Nr. 06/L-114 për Zyrtarët Publikë, konkretisht paragrafin 5 të këtij neni, i cili përcakton se: *“Një person, që mban një pozitë të Shërbimit Civil sipas Ligjit të Shërbimit Civil (03/L-149), e cila nuk është pozitë e Shërbimit Civil për nga funksionet dhe përgjegjësitë e saj sipas këtij ligji, do të përshtatet (rregullohet) me statusin e duhur të punësimit të përcaktuar sipas këtij ligji (punonjës i shërbimit publik, zyrtar i kabinetit, staf administrativ dhe mbështetës). Nëse personi refuzon të hyjë në këto marrëdhënie të tjera të punësimit, do të lirohet, sipas ligjit, nga Shërbimi Civil”*, rrjedhimisht sipas këtij neni Institucionet e Administratës Publike, kanë qenë të obliguara që të bëjnë deklarimin e zyrtarëve publikë, pa marr parasysh që këta zyrtarë e kanë statusin e nëpunësit civil apo jo, kështu që edhe Ministria e Kulturës, Rinisë dhe Sportit, në rastin konkret të ankuesit ka vepruar në pajtim me legjislacionin e lartë cekur edhe pse ankuesi asnjëherë nuk ka pasur Akt Emërim për pozitën që mban por ka pasur Kontratë sipas Ligjit të Punës.

Kolegji për shqyrtimin dhe vendosjen e ankesave, referuar kësaj dispozite, po ashtu referuar edhe dispozitave të Ligjit Nr. 06/L-114 për Zyrtarët Publikë, me të cilën është paraparë pozita “Vozitës”, konkretisht nenit 2 paragrafit 6 të Ligjit Nr. 06/L-114 për Zyrtarët Publikë, i cili përcakton se: *“Nëpunës administrativo-teknik dhe mbështetës është zyrtari publik, që kryen veprimtari ndihmëse, të mirëmbajtjes, ruajtjes, vozitjes, si dhe veprimtari të tjera të ngjashme në institucionet e administratës publike”*, ka konstatuar se pozita e ankuesit me dispozitat e Ligjit Nr. 06/L-114 për Zyrtarët Publikë është kategorizuar si nëpunës administrativo teknik, andaj sipas kësaj Menaxheri i Personelit i Ministrisë së Kulturës, Rinisë dhe Sportit, duke pasur parasysh edhe listën për deklarimin e statusit të zyrtarëve publikë të dërguar nga Departamenti për Menaxhimin e Zyrtarëve Publikë të Ministrisë së Punëve të Brendshme, ka nxjerr Vendimin me Nr.75/2021 të datës 30.11.2021 për deklarimin e statusit të zyrtarit publikë për rastin e ankuesit në pajtim me nenin 2 paragrafin 6 dhe nenin 83 paragrafin 5 të Ligjit Nr.06/L-114 për Zyrtarët Publikë, si dhe në pajtim me nenin 5 të Rregullores (QRK) Nr.10/2020 për Deklarimin e Statusit të Zyrtarëve Publikë.

Andaj Kolegji për shqyrtimin dhe vendosjen e ankesave, konstaton se pretendimi ankimor i ankuesit lidhur me ndërrimin e statusit nga nëpunës civil në nëpunës administrativ dhe mbështetës, është i pabazuar sepse vendimi për deklarim të statusit të zyrtarit publikë është nxjerrë në pajtim me Ligjin për Zyrtarët Publikë dhe Rregulloren (QRK) Nr.10/2020 për Deklarimin e Statusit të Zyrtarit Publikë.




Duke marrë parasysh të gjitha shkresat e lëndës dhe provat e bashkëngjitura në lëndë, Kolegji për shqyrtimin e ankesave, bazuar në nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.1 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës, vendosi si në dispozitiv të këtij Vendimi.

**Këshillë juridike:** Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë-Departamenti Administrativ, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

**KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS**  
Lënda me numër A nr.1008/2021

Ardita Perçuku-Shyti



Procesmbajtëse

Malsore GASHI-BAJRAKTARI



Kryetare e Kolegjit

**Vendimi i dërgohet**

- Ankuesit
- Sekretarit të Përgjithshëm të Ministrisë së Kulturës, Rinisë dhe Sportit;
- Udhëheqësit të Njesisë së Burimeve Njerëzore në Ministrinë e Kulturës, Rinisë dhe Sportit dhe
- Arkivit të KPMSHCK-së.

